

## **Naqqiut**

### **Siunnersuut 26. februar 2016-imeersoq taarserpaa**

**Tungaviusoq: naqqiummi, Inatsisartut Allattoqarfianit innersuussineq malillugu, siunnersuutip kalaallisoortaani qulequtaani allannguutit ilanngunneqarput.**

**Iluarsiinerit pingaarnersaannut nassuiaat: Inatsisartut Allattoqarfianit innersuussineq malillugu inatsisissatut siunnersuutip kalaallisoortaata qulequtaani oqaatsitigut iluarsisoqarpoq.**

**Uunga siunnersuut: Nunami inuussutissarsiutinut tunngatillugu inuussutissarsiornermik siuarsaaneq pillugu Inatsisartut inatsisaata allanngortinneqarneranik Inatsisartut inatsisaat nr. xx, xx. xxxx 2016-imeersoq (Aallarnisaasunik ineriartortitsineramik ingerlataqarnermut tapersiisarneq)**

## **§ 1**

Nunami inuussutissarsiutinut tunngatillugu inuussutissarsiornermik siuarsaaneq pillugu Inatsisartut inatsisaat nr. 20, 3. december 2012-imeersumi makkua allanngortinneqarput:

1. § 1 kingorna ilanngunneqassaaq:

”§ 1 a. Aallarnisaasunik ineriartortitsineramik ingerlataqarnerit piffissamut killiligaasut, tassaasut aallarnisaasunut aalajangersimasunut pikkorissaanerit aamma siunnersuineq, aammalu assersuutigalugu amerlanerusunik imaluunniit annertunerusunik inuussutissarsiornermi ingerlataqalerluni imaluunniit inuussutissarsiornermut suliffeqarfimmi sulisunut suliffissaqartitsinerulerluni inuiaqatigiit aningaasaqarnerannut iluaqutissartaqartitsilersussatut nalilerneqartut, tapersiivigineqartarnissaat siunertaralugu, aallarnisaasunik ineriartortitsinermut aqqissuussanik aningaasalersuinissamut aningaasaliissutinik ataatsimoortunik pilersitsisoqarsinnaavoq.”

2. § 5 kingorna ilanngunneqassaaq:

”§ 5 a. Tapersiineq aamma aallarnisaasunik ineriartortitsinermut ingerlatanut tunniussivigineqassaaq.

Imm. 2. Imm. 1 naapertorlugu aallarnisaasunik ineriartortitsinermut ingerlatat tassaapput pikkorissaalluni aamma siunnersuilluni ingerlataqarnerit piffissamut killiligaasut, aallarnisaasunut aallarnisarnerup immikkoortuaniittunut, aammalu aallarnisaasunut

suliffeqarfiutiminni Kalaallit Nunaanni qaammatinit 12-init sivikinnerusumik nalunaarsorsimasimasunut, ikiorsiissutigineqarsinnaasut.

Imm. 3. Aallarnisaasunik ineriartortitsinermut ingerlatanut tapersiissutit piffissamut qaammatit 24-it ikillugit sivisussusilimmut tunniunneqarsinnaapput.

Imm. 4. Naalackersuisut aallarnisaasunik ineriartortitsinermut ingerlatanut aalajangersakkanik erseqqinnerusunik aalajangersaasinnaapput, ilanngullugit tapersiissutininik tunniussinissamut atugassarititaasut.”

3. § 10, imm. 1, imatut oqaasertalerneqassaaq:

” §§ 5 aamma 5 a malillugit tapersiissutit allaffissornikkut aqunneqarnissaat pillugu kommunalbestyrelsimut imaluunniit ingerlatseqatigiiffimmut allaffissornermik suliaqartumut Naalackersuisut isumaqatigiissuteqarsinnaapput.”

## § 2

Inatsisartut inatsisaat atortuulissaaq ulloq 1. juuni 2016.

*Namminersorlutik Oqartussat, ulloq xx. xxxx 2016*

Kim Kielsen